

1 ಯೋಹಾನನು ಬರೆದ ಮೊದಲನೆಯ ಪತ್ರಿಕೆ ಯೋಹಾನನೇ ಲೀಖ್ಯೋತೆ ಪಹಿಲಿ ಚಿಟ್ಟಿ

ಮಾಲುಮ್ ಕರಾನು

ಯೋಹಾನನೇ ಲೀಖ್ಯೋತೆ ಪಹಿಲಿ ಚಿಟ್ಟಿ ಅಪೊಸ್ತಲ ಯೋಹಾನನೇ ಕ್ರಿಸ್ತನು ಪೈದಾಖ್ತನ ವಾರ್ 50 ಅಜ್ಜು 100 ವರಖ್ತನ ಬೀಚ್ಚ ಲೀಖಿರಾಖ್ಯೊಸ್. ಯೋಹಾನನೇ ಯೋಸ್ ಲೀಖವಾಳೊಕರಿ ವತಾಳಿರಾಖ್ಯೊ ಕೊಯ್ನಿ ಕತೋಬಿ ಪಹಿಲ ಅದ್ಯಾಯಮ ಯೋ ಯೇಸುನು ಜಿವ್ಣು ಅಜ್ಜು ಮರಿನ್ ಉರೈತೆ ಡೋಳಿಮ್ಮ ದೆಖ್ಯೊತೆ ಸಾಕ್ಷಿಹುಯಿರೈಸ್ ಕರಿ ವತಾಳಿದೇಸ್. ಯೋಹಾನನೇ ಲೀಖ್ಯೋತೆ ಪಹಿಲಿ ಚಿಟ್ಟೀಮ ಲೀಖಿರಾಖನು ತರೀಕ ಯೋಹಾನನೇ ಲೀಖ್ಯೋತೆ ಸುವಾರ್ತೆನು ಲೀಖ್ಯಾನ ಘಣು ಖನ್ನೆಲ್ಲಾ ಯೋಹಾನನೇ ಲೀಖ್ಯೋತೆ ಸುವಾರ್ತೆ ಯೋಹಾನನೇಸ್ ಲೀಖಿರಾಖ್ಯೊಸ್ ಕರಿ ವಿಶ್ವಾಸ್ ಕರಸ್. ಅಜ್ಜು ಯೋಹಾನನೇ ಲೀಖ್ಯೋತೆ ಏಕ್‌ನಿ ಚಿಟ್ಟಿ, ಬೇನಿ ಚಿಟ್ಟಿ ಅಜ್ಜು ತೀನ್ನಿ ಚಿಟ್ಟಿಬಿ ಜಿನು ಇನೆ ಎಫೆಸಮ ಜಿವ್ಣುಕರುಕರಾನಿ ವಖ್ತೆ ಲೀಖಿರಾಖ್ಯೊಸ್ ಕರಿ ವಿಶ್ವಾಸ್ ಕರಸ್.

ಯೋಹಾನನೇ ದೇವ್‌ಮ ವಿಶ್ವಾಸ್‌ಕೊಂತೆ ಬೋಲಾವಸ್ತೆ ಕರಿ ಅದ್ನಿನು ಝುಂಡ್‌ಧಿ ತಕ್ಲಿಬ್‌ಮ ರ್ವಾನಿವಖ್ತೆ ಅಖ್ವಾಸ್ ಕ್ರಿಸ್ತ ವಿಶ್ವಾಸಿನಖ್ವಾಜೆ ಆ ಚಿಟ್ಟಿ ಲೀಖ್ಯೊ ಆ ಅದ್ನಿ ಯೇಸು ಭರ್‌ಪೂರ್‌ಧಿ ದೇವ್ ಹುಯಿರೈಸ್‌ಕರಿ ಕತೋಬಿ ಜಮೀನ್‌ಪರ್ ಯೋರ್ವ್ವಾನಿ ವಖ್ತೆ ಲೋಯಿಧಿ ಬೋಟೀಧಿ ಅದ್ನಿನ ಶರೀರ್‌ನ ಲೀರಾಖ್ಯೊಸ್ತೆ ಖ್ವಾಚ ಕಾಹೆಕರಿ ವಿಶ್ವಾಸ್ ಕರಿರಾಖ್ತು ಅನಖ್ವಾಜೆ ಯೋಹಾನನೇ ಯೇಸುನು ಜಿವ್ಣು ಅಜ್ಜು ಇನ ಶೊಂತ್ ಹಾತೇಮ್ಮ ಇನ ಮೂಚಿರಾಖನು ಏಕ್ ಡೋಳಿಮ್ಮ ದೇಖಾನಿತರನು ಸಾಕ್ಷಿ ಹುಯಿರ್ವ್ವಾನಿ ಬಾರೇಮ ಲೀಖಸ್. 1:1-3 ಯೋಹಾನ ಆ ಚಿಟ್ಟಿ ಲೀಖಾನಿ ಉದ್ದೇಶ್ ಶಾತ್‌ಕತೊ ಇನು ಶಂತೋಖ್ತನ ಭರ್‌ಪೂರ್ ಕರಸ್. 1 ಯೋಹಾನ 1:4

ವಿಶ್ವಾಸಿನ ಪಾಪಕರಾಧಿ ದೂರರಾಖಸ್. 1 ಯೋಹಾನ 2:1, ಝೂಟಿ ಬೋಧನೆಧಿ ವಿಶ್ವಾಸಿಖ್ವಾರನ ಬಚ್ಚಾಡಸ್. 1 ಯೋಹಾನ 2:26 ಅಜ್ಜು ಇವ್ವೆ ಬಚಿಗಯ ಕರಿ ವಿಶ್ವಾಸಿಯೇವ್ನ ಖ್ವಯಾಲ್ಮಲ್ಯಾವಾನು ಹುಯಿರಲ್ವುಡು 5:13

ಕಾಡಿದೇಖೊ

1. ಯೋಹಾನ ಇನು ಬಾರೇಮ ಬೋಲಿಲೆಸ್. ಅಜ್ಜು ಆ ಚಿಟ್ಟಿನ ಲೀಖಾನ ಏಕ್ ಉದ್ದೇಶ್ ಛಾಕರಿ ಬೋಲಲ್. 1 ಯೋಹಾನ 1:4
2. ಇನಕೇಡೆಡು ಇನೆ ದೇವ್ ಕಿಮ್ ಉಚ್ಚಾಳು ಹುಯಿರಲ್ವೊಸ್. ಅಜ್ಜು ಅಪ್ಪೆ ಯೇಸುನೆ ಜಿವ್ವು ಕರಲ್ವೊತೆ ಇಮ್ಮಸ್ ಜಿವ್ವು ಕರಲ್ವೊಕರಿ ಬೋಲಾನು ಬಾರೇಮ ಬೋಲಿವತಾಳಸ್. 1:5—3:10
3. ಇನಕೇಡೆಡು ಇನೆ ಏಕ್‌ಥಿ ಏಕ್ ಪ್ಯಾರ್ ಕರ್ನುಕರಿ ಹುಕುಮ್‌ನ ಯಾದ್ ಕರಾವಸ್. 3:11—5:12
4. ಇನೆ ಇನು ಬಾರೇಮ ಖತಮ್ ಕರಸ್. 5:13-21

ಜಾನ್ನಿ ವಚನ್

1 ತುಮೆ ಖ್ವಮ್‌ಜುಕರಸ್ತೆ ಜಾನ್ನಿ ವಚನ್ ಶುರುವಾಧೂಸ್ ಛಾತೆ. ಇನ ಕಾನ್‌ಥಿ ಖ್ವಮ್‌ಜಿರಾಖ್ಯಸ್; ಡೋಳೆಖ್ವು ದೇಖಿರಾಖ್ಯಸ್, ದಿಲ್‌ಥಿ ಮಾನಿರಾಖ್ಯಸ್, ಅಜ್ಜು ಹಾತೇಥಿ ಛಿಮಿರಾಖ್ಯಸ್.

2 ಯೋ ಜಾನ್ ಹಮೂನ ದೆಖಾಯು. ಹಮೆ ಇನ ದೇಖ್ಯಾತೆ ಇನಖ್ವಾಜೇಸ್ ಇನಿ ಬಾರೇಮ ಸಾಕ್ಷಿ ಬೋಲಾನಿತರ ಹುಯು. ಯೋ ಬಾ ಜೋಡ್ಡರಲ್ವೊನ್ ಹಮುನ ದೆಖಾಯುತೆ ಹರ್‌ಹಮೇಶಾನೊ ಜಾನ್ ತುಮುನ ಬೋಲಿವತಾಳೆಸ್.

3 ಬಾ ಹುಯಿರೋತೆ ದೇವ್ನ ಅಜ್ಜು ಇನೊ ಛಿಯೊ ಹುಯಿರೋತೆ ಯೇಸುಕ್ರಿಸ್ತನಿ ಜೋಡ್ಡರಲ್ವೊವಾನುಬಿ ಹಮುನ ಛಾತೆ ಗಳೊಜೋಡ್ಡ ತುಮೆಜಿನು ಭಾಗ್‌ಲೀಲ್ಯವಾಳ ಹುಯಿರಲ್ವೊವುಕರಿ ಹಮೆ ದೇಖಿರಾಖ್ಯತೆ, ಖ್ವಮ್‌ಜಿರಾಖ್ಯತೆ ತುಮೂನ ಬೋಲಿವತಾಳೆಸ್.

4 ಅಪ್ಪಿ ಶಂತೋಖ್ವ್ ಪೂರ ಹುವಾದೆಕರಿ ಹಮೆ ಅನಿ ಬಾರೇಮ ಲೀಖುಕರಿಯೇಸ್.

ದೇವಸ್ ಉಜ್ಜಾಳು

5 ಹಮೆ ದೇವ್ನ ಛಿಯ್ಯಾಥಿ ಖ್ವಮ್‌ಜಿನ್ ತುಮುನ ಖ್ವಮ್‌ಜಾಡಾನಿ ವಾತೆ ಶಾತ್‌ಕತೊ ದೇವ್ ಉಜ್ಜಾಳು ಹುಯಿರ್ರ್ಹೊಸ್, ಇನಾಮ ಥೋಡುಬಿ ಅಂಧಾರುಕೊಯ್ನಿ.

6 ಇನಖ್ವಾಜೇಥಿ ಅಪ್ಲೆ ಅಂಧಾರಮ ಜಿವ್ಣು ಕರ್ತಹುಯಿನ್ ದೇವ್ನಿ ಜೋಡ್ತ್ ಗಳ್‌ಜೋಡ್‌ಥಿ ಛೀಯೆಕರಿ ಬೋಲ್ಯಾತೊ ಅಪ್ಲೆ ಝೂಟೆ ಹುಯಿರ್ರ್ಹೊಸ್ ನಿಯತ್ತು ಜಿವ್ಣು ಜಿವವಾಳ ಕಾಹೆ.

7 ಕತೋಬಿ ದೇವ್ ಉಜ್ಜಾಳಮ ರ್ಹಾವನಿತರಸ್ ಅಪ್ಲೆಬಿ ಉಜ್ಜಾಳಮ ಚಾಲ್ಯಾತೊ ಅಪ್ಲೆ ಏಕ್‌ಥಿಏಕ್ ಗಳ್‌ಜೋಡ್‌ಥಿ ರ್ಹಾಯೇಜಾಯ್ ತದೆ ಇನೊ ಎಕ್ಕ್‌ಸ್ ದೇವ್‌ನೊ ಛಿಯ್ಕೊ ಯೇಸುನು ಲ್ಹೊಯಿ ಅಪ್ಪುನ ಅಖ್ವಾ ಪಾಪ್‌ಥಿ ಛೋಡ್ತೆನ್ ಪಾಕ್‌ಕರಾಸ್.

8 ಅಪ್ಪಾಮ ಪಾಪ್‌ಕೊಯ್ನಿಕರಿ ಅಪ್ಲೆ ಬೋಲ್ಯಾತೊ ಅಪ್ಪುನ ಅಪ್ಲೆಸ್ ರಗೈಲ್ಯವಾಳ ಹುಯಿರಾಸ್ ಅಜ್ಜು ಖ್ವಾಚಿ ಕರಿ ಬೋಲಾನು ಅಪ್ಪಾಮ ಕೊಯ್ನಿ.

9 ಕತೋಬಿ ಅಪ್ಲೆ ಅಪ್ಪ ಪಾಪ್ ಮಾನೀನ್ ಬೋಲಿಲಿದತೊ ತದೆ ವಿಶ್ವಾಸ್‌ವಾಳೊಬಿ ನೀತಿವಾಳೊಬಿ ಹುಯಿರ್ರ್ಹೊತೆ ದೇವ್ ಅಪ್ಪಪಾಪ್ ಕ್ಷಮಾಪಣ್ ಕರಿನ್ ಅಖ್ವಿ ನೀಚ್‌ಕಾಮ್‌ಥಿ ಅಪ್ಪುನ ಪಾಕ್‌ಕರಶೆ.

10 ಅಪ್ಲೆ ಪಾಪ್ ಕರ್ಯಾಕೊಯ್ನಿಕರಿ ಬೋಲ್ಯಾತೊ ದೇವ್ ಝೂಟೊ ಕರಾನಿತರ ಉಶೆ. ಅಜ್ಜು ಇನಿವಚನ್ ಅಪ್ಪಾಮ ಭಡ್‌ಗಾರಿ ರ್ಹೆಶೆಕೊಯ್ನಿ.

2

ಕ್ರಿಸ್ತ ಅಪ್ಲೊ ಮದತ್‌ಕರಾವಾಳು

1 ಮಾರ ಪ್ಯಾರ್‌ನ ಲಡ್ಕಾವೊ, ತುಮೆ ಪಾಪ್ ನಾಕರ್ಯ್ತೆ ರ್ಹೆವ್ಣು ಮೇ ಆ ಅಖ್ವು ತುಮೂನ ಲೀಖುಕರುಸ್. ಏಕ್ ವೇಳ್ ಕೋಣ್‌ತೋಬಿ ಪಾಪ್ ಕರ್ಯಾಸ್‌ಉಶೆತೊ ಅಪ್ಪ ಭಣೀಧು ಬಾಕನ

ಬೋಲಿಲ್ಯವಾನ ಏಕ್‌ಜಣೊ ಛಾ. ಯೋಸ್ ನೀತಿವಾಳೊ ಯೇಸುಕ್ರಿಸ್ತ ಮದತ್‌ಕರಾವಾಳು ಹುಯಿರೋಸ್.

² ಯೋ ಅಪ್ಪ ಪಾಪ್ಪ ಕ್ಷಮಾಪಣ್‌ನಖ್ವಾಜೆ ಪರಿಹಾರ್‌ನ್ನಿ ಬಲಿಹುಯಿರೋಸ್. ಅಪ್ಪ ಪಾಪ್ಪಕರಿ ಖಲಿಕಾಹೆ ಅಖ್ವಾ ಜಗತ್ತ್ ಖ್ವಾರ ಅದ್ವಿನ ಪಾಪ್ಪಖ್ವಾಜೆಬಿ ಪರಿಹಾರ್ ಹುಯಿರೋಸ್.

³ ಅಪ್ಪೆ ಇನಿ ಹುಕುಮ್‌ನ ವಿಧೇಯ ಹುಯಿನ್ ಚಾಲಿಲ್ಯವಾನುಸ್ ಅಪ್ಪೆ ಇನಿ ಮಾಲುಮ್ ಕರಿಲಿದಾಕರಿ ಖ್ವಮ್‌ಜಿಲಿಯೇಸ್.

⁴ ಏಕ್‌ಜಣೊ, ಮನ ಯೊ ಮಾಲುಮ್ ಕರಿ ಬೋಲಿನ್ ಇನ ಹುಕುಮ್‌ನಿತರ ನಾ ಚಾಲಿಲೀದೊತೊ ಯೋ ಝೂಟೊ ಹುಯಿರೋಸ್. ಖ್ವಾಚುಕರಿ ಬೋಲಾನು ಇನಾಮ ಕೊಯ್ನಿ.

⁵ ಕೋಣ್‌ತೋಬಿ ಇನಿ ವಚನ್ನ್ ಲೀನ್ ಚಾಲ್ಯೋತೊ ಇನಾಮ ಖ್ವಚೆಂಬಿ ದೇವ್‌ಪರ್‌ನ ಪ್ಯಾರ್ ಭರ್‌ಪೂರ್ ಹುಯಿರೋಸ್. ಅಧ್ರಾನ್ ಕಾಮ್‌ಥಿ ಅಪ್ಪೆ ಇನಾಮ ಛಿಯೆಕರಿ ಮಾಲುಮ್ ಕರಿಲಿಯೇಸ್.

⁶ ದೇವ್‌ಮ ತಳ್‌ಗಾರಿನ್ ಛೂಕರಿ ಬೋಲವಾಳೊ ಯೇಸು ಚಾಲಿಲಿದೋತೆ ತಿಮ್ಮಸ್ ಯೋಬಿ ಜಿವ್ಣುಕರನ್.

ನವಿ ಹುಕುಮ್

⁷ ಮಾರ ಪ್ಯಾರ್‌ನ ಬೈಯೇ ಭೇನೆವೊ, ಮೇ ತುಮೂನ ಲೀಖುಕರುತೆ ನವಿ ಹುಕುಮ್ ಕಾಹೆ, ಹೈರಿತೆ ಜೂನಿ ಹುಕುಮ್ ಹುಯಿರೋಸ್. ಆ ಜೂನಿ ಹುಕುಮ್ ತುಮೆ ಖ್ವಮ್‌ಜಾತೆ ವಚನಸ್.

⁸ ಕತೋಬಿ ಮೇ ತುಮೂನ ಲೀಖುಕರುತೆ ನವಿ ಹುಕುಮ್‌ನಿತರಾಸ್ ಛಾ. ಹೈರುತೆ ಇನಾಮಾಬಿ ತುಮಾರಮಾಬಿ ಖ್ವಾಚುಹುಯಿರೋಸ್. ಶನಕತೊ ಅಂಧಾರು ಚಲ್ಯುಜೈನ್, ಖ್ವಾಚು ಉಜಾಳು ಹಮ್ಮೆ ಉಜಾಖ್ ಹೂಕರಸ್.

⁹ ಮೇ ಉಜಾಳಾಮ ಛೂ ಕರಿ ಬೋಲಿಲೀನ್ ಇನ ಬೈಯೇ ಭೇನೆನ ವಹೇರ್‌ಕರವಾಳೊ ಹಮ್ಮೆಲಗೂಬಿ ಅಂಧಾರಮ ಛಾ.

¹⁰ ಇನ ಬೈಯೇ ಭೇನೆನ ಪ್ಯಾರ್ ಕರಾವಾಳೊ ಉಜಾಳಾಮ ಜಿವ್ಣುಕರವಾಳೊ ಹುಯಿರೋಸ್ ಅಜು ಪಾಪ್‌ಮ ಧೊಕ್‌ಡೈನ್ ಪಡಾನು ಶಾತ್ರಿ ಇನಾಮ ಕೊಯ್ನಿ.

11 ಕತೋಬಿ ಇನ ಬೈಯೇ ಕೊಯಿನ್ನೊ ಭೇನೇನ ವಹೇರ್‌ಕರವಾಳೊ ಅಂಧಾರಮ ಛಾ ಅಜು ಅಂಧಾರಮ ಚಾಲವಾಳೊ ಹುಯಿರ್ರೊಸ್. ಅಂಧಾರು ಇನ ಡೋಳಾನ ಕಾಣುಕರಿನಾಖಿದಿದುತೆ ಇನಖ್ವಾಜೆ ಯೊ ಕಿಜ್ಜಾ ವಳೆಜುವುಸ್ ಕರಿ ಇನ ಮಾಲುಮ್ ಕೊಯ್ನಿ.

12 ಪ್ಯಾರ್‌ನ ಲಡ್ಕಾವೊ ಕ್ರಿಸ್ತನ ನಾಮ್‌ಪರ್ ತುಮಾರಿ ಪಾಪ್‌ಅಖ್ವು ಕ್ಷಮಾಪಣ್ ಹುಯಿರ್ರೊಸ್ತೆ ಇನಖ್ವಾಜೆ ಮೇ ತುಮೂನ ಲೀಖುಕರುಸ್.

13 ಬಾಖ್ವಾರ್ ತುಮೆ ಶುರುವಾಥೂಸ್ ರ್ವಾವಾಳನ ತುಮೆ ಮಾಲುಮ್ ಕರಿರಾಖ್ಯತೆ ಇನಖ್ವಾಜೆ ಮೆ ತುಮೂನ ಲೀಖುಕರುಸ್. ಚಾನ್ಲಮಾನ್ ಹುಯಿರಾತೆ ತುಮೆ ವಹೇರ್‌ನ್ಯಾ ಜೂತಿರಾಖ್ಯಸ್ ಇನಖ್ವಾಜೆ ತುಮೂನ ಲೀಖುಕರುಸ್.

14 ಲಡ್ಕಾವೊ, ತುಮೆ ಬಾನ ಮಾಲುಮ್ ಕರಿರಾಖ್ಯತೆ ಇನಖ್ವಾಜೆ ತುಮೂನ ಲೀಖುಕರುಸ್. ತುಮೆ ಶಕತ್‌ವಾಳ ಹುಯಿರಾತೆ ಇನಖ್ವಾಜೇಬಿ ದೇವ್ನಿ ವಚನ್ ತುಮಾರಮ ಜಿವಿರ್ರೊಸ್ತೆ ಇನಖ್ವಾಜೇಬಿ ಕೇಡ್ ಕರವಾಳನ ಹರೈರಾಖ್ಯತೆ ತುಮೂನ ಮೇ ಲೀಖುಕರುಸ್.

15 ಜಗತ್ತರ್ರೊವೊ ಜಗತ್‌ಮರ್ರೊಯಿತೆ ಇನರ್ದೊವೊ ಪ್ಯಾರ್‌ನಕೊ ಕರೊ. ಕೋಣ್‌ತೋಬಿ ಜಗತ್ತ್ ಪ್ಯಾರ್‌ಕರ್ರೊತೊ ಬಾನ ಉಪ್ಪರ್‌ಲ್ಲಾತೆ ಪ್ಯಾರ್ ಇನಾಮ ಕೊಯ್ನಿ.

16 ಜಗತ್‌ಮಲ್ಲಾತೆ ಶರೀರ್‌ನಿ ಆಖ್ವ್ ಡೋಳಾನಿಆಖ್ವ್ ಜಿವ್ವಮ ಚಾಲಾತೆ ಗಬ್ಬರ್, ಹೈರುತೆ ಬಾನ ಸಂಬಂದ್‌ನು ಕಾಹೆ. ಜಗತ್‌ನು ಹುಯಿರ್ರೊಸ್.

17 ಜಗತ್‌ಬಿ ಇನು ಹರಖ್ವೊಬಿ ಮಟಿಜಾಶೆ. ಕತೋಬಿ ದೇವ್ನು ಮರ್ಜಿನ್ ಚಾಲವವಾಳೊ ಕದಕದೇಬಿ ಜಿವಿರ್ರೊಶೆ.

ಕ್ರಿಸ್ತನು ವಿರೋದಿ

18 ಪ್ಯಾರ್‌ನ ಲಡ್ಕಾವೊ, ಹೈರುತೆ ಖರ್ತಿನು ಹಗಾಮ್ ಹುಯಿರ್ರೊಸ್. ಕ್ರಿಸ್ತ ವಿರೋದಿ ಆವಾಶೆಕರಿ ತುಮೆ ಖ್ವಮ್‌ಜಿರಾಖ್ಯಾಸ್. ಹಮ್ಕೆಸ್ ಕೆತ್ರೊಕಿ ಕ್ರಿಸ್ತವಿರೋದಿ ಛಾ. ಇನಖ್ವಾಜೆ ಹಮ್ಕೆ ಖರ್ತಿನ ಹಗಾಮ್ ಹುಯಿರ್ರೊಸ್‌ಕರಿ ಅಪ್ಪುನ ಮಾಲುಮ್ ಛಾ.

19 ಇವೆಲ್ಲಾ ಒಮ್ಮೆ ಅಪ್ಪ ಖನ್ನೆದಿ ನಿಕ್ಕಿ ಚಲೀಗು. ಶನಕತೊ ಇವ್ವೆ ಖ್ವಾಚಮಾಬಿ ಅಪ್ಪವಾಳು ಕಾಹೆ. ಇವ್ವೆ ಅಪ್ಪವಾಳು ರ್ಡಿಯುಹೊತ್ತೊ, ಅಪ್ಪಿಜೋಡ್ಡಾಸ್ ರ್ಡಿಯುಹೊತ್. ಕತೋಬಿ ಇವ್ವೆ ಅಪ್ಪೇದಿ ನಿಕ್ಕಿಗಯುತೆ ಇನಖ್ವಾಜೆ ಇವ್ವೆಅಮ್ಮಿ ಅಪ್ಪವಾಳು ಕಾಹೆಕರಿ ಖ್ವಾಚೇದಿ ಮಾಲುಮ್‌ಪಡಸ್.

20 ಕತೋಬಿ ತುಮೆ ಪವಿತ್ರ ಹುಯಿರೋತೆ ಇನೇದಿ ಪವಿತ್ರಾತ್ಮನ ಅಭಿಷೇಕನ ತುಮಾರಪರ್ ಲೀರಾಖವಾಳ ಹುಯಿರ್ದಾಸ್, ಇನಖ್ವಾಜೆ ತುಮೆಖ್ವಾರು ಖ್ವಾಚಿನ ಮಾಲುಮ್ ಕರಿರಾಖ್.

21 ತುಮೆ ಖ್ವಾಚಿ ಮಾಲುಮ್ ಕರಿರಾಖ್, ಕತೋಬಿ ಕೊಯ್ನಿ ಕರಿ ಲಾರ್ಪಿನ್ ಮೆ ಅನ ಕೊಲೀಖುಕರುನಿ. ಕತೋಬಿ ಖ್ವಾಚಿನ ಖ್ವಮ್‌ಜಿರಾಖವಾಳ; ಖ್ವಾಚೇದಿ ಝೂಟಿ ಉಬ್‌ಜಾಕೊಯ್ನಿ ಕರಿ ಮಾಲುಮ್ ಕರಿರಾಖವಾಳ. ಅನಖ್ವಾಜೇದಿ ಮೇ ತುಮೂನ ಲೀಖಿರಾಖ್.

22 ಝೂಟಿಖೋರ್ ಕೋಣ್? ಯೇಸುನ ಪ್ರಭು ಕಾಹೆಕರಿ ಕೋಣ್ ಝಿಟ್ಕಾರಸ್ಕಿ ಯೋಸ್ ಝೂಟಿಖೋರ್ ಹುಯಿರಾಸ್, ಯೋ ಕ್ರಿಸ್ತವಿರೋದಿ, ಯೊ ಬಾನಾಬಿ ಅಜ್ಜು ಛಿಯ್ಯಾನಾಬಿ ಝಿಟ್ಕಾರವಾಳೊ ಹುಯಿರ್ದಾಸ್.

23 ಕೋಣ್ ದೇವ್ನ ಛಿಯ್ಯಾನ ಝಿಟ್ಕಾರವಾಳೊಕಿ ಯೋ ದೇವ್ನ ಮಳ್ಳೊಹುಯೊ ಕಾಹೆ. ಕೋಣ್ ಛಿಯ್ಯಾನ ಮಾನಿಲೇಸ್ಕಿ ಯೋ ಬಾಹುಯಿರೋತೆ ದೇವ್ನ ಮಳ್ಳೊಹುಯೊ ಹುಯಿರ್ದಾಸ್.

24 ಪಹಿಲೆಥೂಬಿ ತುಮೆ ಖಿವಿ ಸುವಾರ್ತೆನ ಖ್ವಮ್‌ಜ್ಯಾಕಿ ಯೊ ತುಮಾರಮ ರ್ಡ್ತಿಶೆ. ಇನಖ್ವಾಜೆ ತುಮೇಬಿ ಪಹಿಲೆಥೀಬಿ ಖ್ವಮ್‌ಜ್ಯಾತೆ ಅಲ್ಪಿ ಸಮಾಚಾರ್ ತುಮಾರಮ ರ್ಡಿಯುತೊ ಛಿಯ್ಯಾಮಾಬಿ ಬಾಹುಯಿರೋತೆ ದೇವ್‌ಮಾಬಿ ತುಮೆ ಘಟ್‌ದಿ ರ್ಡ್ತಿಶು.

25 ಯೋ ಅಪ್ಪುನ ವಾಗ್ದಾನ್ ಕರಿರಾಖ್ಲೊಸ್ತೆ ಶಾತ್‌ಕತೊ ಹಮೇಶಾನು ಜಾನ್.

26 ತುಮುನ ಅಲ್ಪಿ ವಾಟ್‌ಮಾಥು ಛುಕ್ಲೆನ್ ಖರಾಬ್ ವಾಟ್‌ಪರ್

ಖೇಚ್ಚಾವಾಳಾನಿ ಬಾರೇಮ ಮೇ ತುಮೂನ ಲೀಖಿರಾಖ್ಯೊಸ್.

27 ತುಮೆ ಪ್ರಭು ಯೇಸುಧಿ ಪವಿತ್ರಾತ್ಮನಿ ಅಭಿಷೇಕ್ ಲೀರಾಖವಾಳ ಹುಯಿರಾಸ್. ಯೊ ಪವಿತ್ರಾತ್ಮ ತುಮಾರಮ ಛಿ. ಅನಖ್ವಾಜೇಡಿ ಕೋಣ್‌ಬಿ ತುಮುನ ಬೋಧನೆ ಕರಾನಿ ಜರೂರತ್ ಕೊಯ್ನಿ. ಇನೆ ತುಮುನ ಕರೈತೆ ಪವಿತ್ರಾತ್ಮಸ್ ತುಮೂನ ಅಖ್ವಿ ಸಮಚಾರ್‌ಮ ಬೋಧನೆ ಕರಾನು ಹುಯಿರುಸ್. ಯೋ ಝೂಟಿಕಾಹೆ ಖ್ವಾಚಿ ಹುಯಿರ್ಲ್ಹಾಸ್. ಯೊ ತುಮೂನ ಬೋಧನೆ ಕರೈತೆ ಪರಕ್ಮಾಸ್ ಇನಾಮ ಘಟ್ ರೈಶು.

28 ಪ್ಯಾರನ ಲಡ್ಕಾವೊ, ಯೋ ದೆಖಾವನಿ ವಖ್ತೆ. ಅಪ್ಲೆ ಇನಖ್ವಾಪ್ಲೆ ಭಿರಾವನ ಖ್ವಾರ್‌ಮಾವ್ಣನಾತೆ ಭಾಲಿಧಿ ರ್ವಾವನಿಘೋಣಿ ಇನಾಮ ತಳ್‌ಗಾರಿನ್ ರೈಯಿ.

29 ಕ್ರಿಸ್ತ ಯೇಸು ನೀತಿವಾಳೊ ಹುಯಿರ್‌ಹೊಸ್ ಕರಿ ತುಮೂನ ಮಾಲುಮ್ ರೈಯುತೊ ನೀತಿನ ಮಾರಗ್‌ಪರ್ ಚಾಲವಾಳು ಹರೇಕ್‌ಜಣುಬಿ ಇನೇಡಿ ಪೈದಹುಯಿರ್ಲ್ಹಾಸ್ ಕರಿ ತುಮೆ ಮಾಲುಮ್ ಕರಿರಾಖವಾಳ ಹುಯಿರ್ಲ್ಹಾಸ್.

3

ದೇವ್‌ಲಡ್ಕಾ

1 ಅಪ್ಲೆ ದೇವ್‌ಲಡ್ಕಾ ಕರಿ ಬೋಲೈಲೇವ್ಣುಕತೊ ಬಾ ಅಪ್ಪುನ ಕೆಥ್ರಾನಿ ಪ್ಯಾರ್ ಕರಿರಾಖ್ಯೊಸ್ ದೇಖೊ; ಖ್ವಚಂಬಿ ಅಪ್ಲೆ ದೇವ್‌ಲಡ್ಕಾ ಹುಯಿರಾಸ್. ಆ ಜಗತ್ ಇನ ಮಾಲುಮ್‌ಕರೈದುಕೊಂತೆ ಇನಾಖ್ವಾಜೆ ಅಪ್ಪುನಾಬಿ ಮಾಲುಮ್ ಕರೈಯ್‌ಕೊಯ್ನಿ.

2 ಪ್ಯಾರನ ದೋಸ್ತಿವೊ ಅಪ್ಲೆ ಹಮ್ಮೆ ದೇವ್‌ಲಡ್ಕಾ. ಅಜು ಆಗಾಡಿ ಅಪ್ಲೆ ಶಾತ್ ಲಿಶುಕರಿ ಕೆಥ್ರಾನವಾಳ ಹುಯಿರ್‌ರೈಯಿ ಕರಿ ಬಿಜ್ಜುಬಿ ಖ್ವಮ್‌ಜ್ಯಕೊಯ್ನಿ. ಕತೋಬಿ ಕ್ರಿಸ್ತಯೇಸು ಆವನಿ ವಖ್ತೆ ಅಪ್ಲೆಬಿ ಇನಿನಿತರಾಸ್ ರಿಶು ಕರಿ ಮಾಲುಮ್ ಕರಿರಾಖ್ಯೊಸ್. ಶನಕತೊ ಯೋ ರೈಶೇತೆ ರೂಪ್‌ಮಸ್ ದೇಕ್‌ಶು.

3 ಕ್ರಿಸ್ತಯೇಸುಪರ್ ರಾವಿಮ್ಹಲ್ಯಾತೆ ಆ ಭರೋಖ್ವಾನ ಹರೇಕ್ ಜಞುಬಿ ಯೋ ಪವಿತ್ರ ಹುಯಿರಾವಾನಿ ಫೋಣಿಸ್ ಇನು ಯೋಸ್ ಪರಿಶುದ್ ಕರಿಲೇಸ್.

4 ಪಾಪ್ ಕರಾವಾಳೊ ಹರೇಕ್ ಜಞೋಬಿ ದೇವ್ನಿ ಹುಕುಮ್ಮ ಕೋರ್ಟ್ವಿಯ್ನಿ. ದೇವ್ನಿ ಹುಕುಮ್‌ನ ಮ್ಹೇಲ್‌ವಾನುಸ್ ಪಾಪ್.

5 ಪಾಪ್ ಖ್ಹಾರುಸ್ ಕಾಡ್ಡುಕರಿ ಕ್ರಿಸ್ತ ಆಯೊಕರಿ ಬೋಲಾನುಬಿ, ಅಜ್ಜು ಇನಾಮ ಪಾಪಸ್ ಕೊಯ್ನಿಕರಿಬಿ ತುಮುನ ಮಾಲುಮ್ ಛಾ.

6 ಇನಾಮ ತಳ್‌ಗಾರಿನ್ ರ್ವೇವವಾಳೊ ಪಾಪ್ಪಕರಕೊಯ್ನಿ; ಪಾಪ್‌ಕರವಾಳೊ ಇನ ದೇವಿರಾಖ್ಯುಬಿ ಕೊಯ್ನಿ. ಮಾಲುಮ್ ಕರ್ಮ್ಯುಬಿ ಕೊಯ್ನಿ;

7 ಪ್ಯಾರ್‌ನ ಲಡ್ಕಾವೊ, ಕೋಣ್‌ಬಿ ತುಮುನ ರಗಾವ್ಣುನಾತೆ ತಿಮ್ ರ್ವೇವೊ. ಕ್ರಿಸ್ತ ಕಿಮ್ ನೀತಿವಾಳೊ ಹುಯಿರೋಸ್ತಿ ತಿಮ್ ನೀತಿಧಿ ಚಲಾವಾಳೊ ಹರೇಕ್‌ಜಞೋಬಿ ನೀತಿವಾಳೊ ಹುಯಿರ್ದೋಸ್.

8 ಪಾಪ್ ಕರಾವಾಳೊ ಶೈತಾನ್‌ನಿ ಪಿಳ್ಗಿವಾಳೊ. ಶೈತಾನ್ ಜಮಾನೇಥುಬಿ ಪಾಪ್ ಕರವಾಳೋಸ್. ಇನಖ್ವಾಜೆ ಇನು ಖರಾಬ್ ಕಾಮ್‌ಖ್ವಾರಾನ ನಾಶ್ ಕರ್ನುಸ್ ಕರಿ, ದೇವ್‌ನೊ ಛಿಯೊ ಆಯೋತೆ.

9 ದೇವ್‌ಧಿ ಪೈದ ಹುಯಿರ್ದವವಾಳೊ ಕೋಣ್‌ಬಿ ಪಾಪ್ ಕರ್ಶೆ ಕೊಯ್ನಿ. ಶನಕತೊ ದೇವ್ನಿ ಸ್ವಭಾವ್ ಇನಾಮ ಛಾ. ಯೋ ದೇವ್‌ಧಿ ಪೈದ ಹುಯಿರ್ದೊಸ್ತೆ ಇನಖ್ವಾಜೆ ಪಾಪ್ ಕರಾನ ಕೋ ಉಶೇನಿ.

10 ಅಜ್ಜು ನೀತಿನ ವಾಟ್‌ಮ ನಾಫಾಲವಾಳೊ, ಇವ್ವ ಬೈಯೇ ಅಜ್ಜು ಭೇನೇನ ಲಾಡ್ ನಾಕರವಾಳೊ ದೇವ್‌ಧಿ ಪೈದಹುಯೊ ಕೊಯ್ನಿ. ಅಮ್ ದೇವ್ನ ಲಡ್ಕಾ ಕೋಣ್ ಅಜ್ಜು ಶೈತಾನ್ನ ಲಡ್ಕಾ ಕೋಣ್‌ಕರಿ ಮಾಲುಮ್ ಕರಿಲೆಯೆಭಾಯ್.

ಏಕ್‌ಧಿ ಏಕ್ ಪ್ಯಾರ್‌ಕರೊ

11 ಅಪ್ಪೆ ಏಕ್‌ಧಿಏಕ್ ಪ್ಯಾರ್‌ಕರ್ಮ್ ಕರಿ ಬೋಲಾನು ಸಂದೇಶ್‌ನಾಸ್ ತುಮೆ ಪಹಿಲೆಥು ಖ್ಹಮ್‌ಜಿರಾಖ್ಯಸ್ತೆ.

12 ಕೇಡ್‌ಕರವಾಳೊ ಹುಯಿರಿನ್ ಇನ ಬೈನಾಸ್ ಭೋಕಿ ಮಾರ್‌ರೋತೆ ಕಾಯಿನನಿಘೋಣಿ ಅಪ್ಪೆ ನಾರ್‌ರೋವು. ಯೋ ಶನ ನ್ಹಾನಬೈನ ಮಾರಿನಾಖಿದೊತೆ? ಇನು ಕಾಮ್‌ಖ್ವಾರು ಖರಾಬ್ ಅಜ್ಜು ಇನ ಬೈನು ಕಾಮ್ ನೀತಿನು ಹುಯಿರ್‌ರ್ದೊತೆ ಇನಖ್ವಾಜೇಸ್.

13 ಬೈಯೇ ಭೇನೆವೊ, ಜಗತ್ ತುಮೂನ ವಹೇರ್ ಕರ್‌ಚೊತೊ ಆಶ್ಚರ್ಯ ನಕೊಕರೊ.

14 ಅಪ್ಪೆ ಅಪ್ಪ ಬೈಯೇ ಭೇನೆವೊನ ಪ್ಯಾರ್ ಕರಾಧಿ ಮರಣ್‌ಧಿ ನಿಕ್ಕಿನ್ ಕದೇಬಿ ರ್ವಾವಾನ ಜಾನ್‌ಮ ಥಿಯೆ ಕರಿ ಅಪ್ಪನ್ನ ಮಾಲುಮ್ ಥಾ. ಕೋಣ್ ಇವ್ಣ ಬೈಯೇ ಭೇನೆನ ಪ್ಯಾರ್ ಕರಾಕೊಯ್ತಿಕಿ ಇವ್ಣ ಮರಣ್‌ಮಾಸ್ ಥಾ.

15 ಕೋಣ್‌ಬಿ ಇವ್ಣ ಬೈಯೇ ಭೇನೆನ ವಹೇರ್ ಕರಾವಾಳೊ ಖೂನಿಹುಯಿರ್‌ರ್ದೊಸ್. ಅಜ್ಜು ಖೆವ ಖೂನಿಮಾಬಿ ಕೆದೇಬಿ ರ್ವಾವಾನು ಜಾನ್ ಕೋರೈಶೇನಿ ಕರಿ ತುಮೂನ ಮಾಲುಮ್.

16 ಪ್ರಭು ಯೇಸು ಅಪ್ಪಖ್ವಾಜೆ ಇನ ಜಾನ್ನಾಸ್ ಮ್ಹೇಲ್ಯೊ ಅನೇಧಿ ಲಾಡ್ ಕೆಧ್ರಾನು ಕರಿ ಅಪ್ಪೆ ಖ್ವಮ್‌ಜಿಲಿದ ಕಿಮ್‌ಕತೊ. ಅಪ್ಪೇಬಿ ಬೈಯೇ ಭೇನೆನಖ್ವಾಜೆ ಜಾನ್ ದೇವವಾಳ ಹುಯಿರಾಸ್.

17 ಅಜ್ಜು ಆ ಲೋಕ್‌ನು ಧನ್‌ದಾಲತ್ ರ್ವಾವಾಳೊ ಕೋಣ್‌ತೋಬಿ ವದೆಖ್ವಮರ್‌ವಾಳ ಇನ ಬೈನ ದೇಖಿನ್ ಗೋರ್‌ನ ಕರ್‌ಚೊತೊ ದೇವ್ನ ಪ್ಯಾರ್ ಇನಾಮ ರ್ವಾವನ ಉಶೇಕಿ ಶು?

18 ಮಾರ ಲಾಡ್ನ ಲಡ್ಕಾವೊ, ತುಮೆಖಾಲಿ ವಾತೆಥೀಬಿ ರ್ವವೊ, ಅಲ್ಟಿವಾತ್ ಬೋಲಾಥೀಬಿ ಪ್ಯಾರ್‌ಕರವಾಳ ನಾಹುಯಿರೇವ್ಣತೆ ಕರ್ನಿಥಿಬಿ ಅಜ್ಜು ಖ್ವಾಜಿ ಮೊಹೊಬಧ್ನಿ ಪ್ಯಾರ್ ಕರಾವಾಳ ಹುಯಿರ್‌ರ್ದೊಣು.

ದೇವ್‌ಮ ಧಿಲ್‌ಪತ್

19 ಅಮ್ ಅಪ್ಪೆ ಖ್ವಾಜಿಮ ಮಳಿರ್‌ವಾಳ ಕರಿ ಅನೇಧಿಸ್ ಅಪ್ಪನ್ನ ಮಾಲುಮ್ ಹುವಾಸ್, ತದೆ ಅಪ್ಪು ದಿಲ್ ದೇವ್ನ ಖ್ವಾಮ್ಣೆ ಛುಟಾದಿಲ್‌ನೊ ಹುಯಿರ್‌ರ್ದೊಸ್.

20 ಖಿವಿ ಬಾರೇಮತೋಬಿ ಅಪ್ಪೊ ದಿಲ್ಲಿ ಸಾಕ್ಷಿ ಅಪ್ಪುನ ಗುರ್ಕಾಯುತೋಬಿ, ಅಖ್ಬುಸ್ ಮಾಲುಮ್ ರ್ವವಾಳೊ ದೇವ್ ಅಪ್ಪ ದಿಲ್ಲಿ ಸಾಕ್ಷಿಥೀಬಿ ಮೋಟೊಕರಿ ಅಪ್ಪುನ ಮಾಲುಮ್ ಛಾ.

21 ಪ್ಯಾರ್‌ನ ಬೈಯೇ ಭೇನೆವೊ ಅಪ್ಪ ದಿಲ್ಲಿ ಸಾಕ್ಷಿ ಅಪ್ಪುನ ಗುರ್ಕಾಯುನಾತೊ, ಅಪ್ಪೆ ದೇವ್ ಖ್ವಾಪ್ಪೆ ಹಿಮ್ಮಡಿರ್ವಾನ ಉಶೆ.

22 ಅಪ್ಪೆ ದೇವ್ನಿ ಹುಕುಮ್‌ನ ಅಖ್ಬುಲೀನ್ ಚಾಲ್ಯಾತೊ ಇನು ಪಸಂದ್‌ನು ಕಾಮ್‌ಕರವಾಳ ಹುಯಿರ್ವಾತೊ ಅಪ್ಪೆ ಶಾಕ್ಷಿ ಮಾಂಗಿ ಲಿಯೆಜಾಯ್.

23 ದೇವ್ನಿ ಹುಕುಮ್ ಶಾತ್‌ಕತೊ ಅಪ್ಪೆ ದೇವ್‌ನೊ ಛಿಯೊ ಪ್ರಭು ಯೇಸುನ ನಾಮ್‌ಪರ್ ವಿಶ್ವಾಸ್‌ಕರೀನ್ ಇನೆ ಹುಕುಮ್ ಕರಿರಾಖೊತೆ ಇಮ್ಮಸ್ ಏಕ್‌ಥಿಏಕ್ ಪ್ಯಾರ್‌ಕರ್ನ್ ಕರಿ ಬೋಲಾನುಸ್.

24 ದೇವ್ನಿ ಹುಕುಮ್‌ನ ಪಾಡಿಚಾಲವಾಳೊ ಇನಾಮ ತಳ್‌ಗಾರಿನ್ ರ್ವೀಸ್. ದೇವ್ ಇವ್ವಾಮ ತಳ್‌ಗಾರಿ ರ್ವೀಸ್. ದೇವ್ ಅಪ್ಪಾಮ ತಳ್‌ಗಾರಿ ಛಾಕರಿ ಯೋ ಅಪ್ಪುನ ಕೃಪೆಥಿ ದೀರಾಖೊತೆ ಪವಿತ್ರಾತ್ಮಥೀಸ್ ಮಾಲುಮ್ ಕರಿಲಿಯೇಸ್.

4

ಕ್ರಿಸ್ತನು ಆತ್ಮ ಅಜ್ಜು ಕ್ರಿಸ್ತ ವಿರೋದಿನು ಆತ್ಮ

1 ಪ್ಯಾರ್‌ನ ಅದ್ವಿವೊ “ಅಪ್ಪಾಮ ಪವಿತ್ರಾತ್ಮ ಛಾ” ಕರಿ ಬೋಲಿಲ್ಯಾವಾಳ ಅಖ್ಬುಸ್ನ ವಿಶ್ವಾಸ್ ನಾಕರ್ನ್. ಯೊ ಹುಮ್ಮಖ್ತ್ ದೇವ್‌ಥಿ ಆಯು ಕಿಶು ಕರಿ ತರೀಪ್‌ಶ ಕರಿನ್ ದೇಖೊ. ಶನಕತೊ ಜಗತ್‌ಮ ಕೆತ್ತುಕ್ಕಿ ಝೂಟು ದೇವ್ನಿ ಸಮಾಚಾರ್ ಬೋಲವಾಳು ಕಿಜ್ಜ ಕಿಜ್ಜಾಬಿ ಫೈಲೈಗು.

2 ದೇವ್ನ ಆತ್ಮಥು ಆಯುತೆ ಹುಮ್ಮಖ್ತ್‌ನ ತುಮೆ ಕಿಮ್ ಖ್ವಣೇದ್ ಕರೇಜಾಯ್‌ಕತೊ; ಅದ್ವಿಹುಯಿನ್ ಆಯೊತೆ ಯೇಸುಕ್ರಿಸ್ತನ ಮಾನಿಲ್ಯವಾನು ಆತ್ಮದೇವ್‌ಥೀಸ್ ಆವಸ್ತೆ.

3 ಯೇಸುನ ಮಾನಿಲೇಯಿಕೊಂತೆ ಆತ್ಮ ದೇವ್‌ಧಿ ಆಯುತೆಕಾಹೆ. ಯೋ ಕ್ರಿಸ್ತವಿರೋದಿ ಆತ್ಮ ಹುಯಿರ್ದೊಸ್. ಯೋ ಆವಾಶೆಕರಿ ತುಮೆ ಖ್ವಿಮ್‌ಜಿರಾಖ್ಯಾಸಾನಿ; ಹಮ್ಮೆ ತದೇಸ್ ಯೋ ಜಗತ್‌ಮ ಅಯಿಗು.

4 ಪ್ಯಾರ್‌ನ ಲಡ್ಕಾವೊ, ತುಮೆತೋಬಿ ದೇವ್‌ಮ ಮಳಿರ್ದವಾಳ. ಅಜ್ಜು ಇನ ತುಮೆ ಜೂತಿರ್ದವಾಳ ಹುಯಿರ್ದೊಸ್ ಇವ್ಣೆ ಜಗತ್‌ಮ ಛಾತೆ ದುರಾತ್ಮಧೀಬಿ ತುಮಾರಮ ಛಾತೆ ಆತ್ಮ ಮಹಾನ್ ಹುಯಿರ್ದೊಸ್ ಇನಖ್ವಾಜೇಧಿಸ್ ಯೋ ಝೂಟ ಪ್ರವಾದಿಯೇವ್‌ನ ಆತ್ಮನ ಜೂತಿಗಯ.

5 ಇವ್ಣೆ ಜಗತ್‌ಮ ಮಳಾವಾಳು. ಅನಖ್ವಾಜೇಧಿ ಇವ್ಣೆಖ್ವಾರು ಆ ಜಗತ್ತಿ ವಾತೆನಾಸ್ ಬೋಲಾಸ್. ಇನಖ್ವಾಜೆ ಆ ಜಗತ್‌ಬಿ ಇವ್ಣಿ ವಾತ್‌ಖ್ವಮ್‌ಜಸ್.

6 ಅಪ್ಣೆತೋಬಿ ದೇವ್‌ಮ ಮಳ್ಳಹುಯ. ದೇವ್ನ್ ಮಾಲುಮ್ ಕರಿರಾಖವಾಳೊ ಅಪ್ಪಭಣಿ ಕಾನ್‌ದೇಸ್. ದೇವ್‌ಮ ಮಳಿರ್ದಿಯಿಕೊಂತೆ ಅಪ್ಪುನ ಕಾನ್‌ದೇಯ್ ಕೊಯ್ನಿ. ಅನಖ್ವಾಜೇಧಿಸ್ ಖ್ವಾಚ್‌ನ ಬೋಲಾನು ಆತ್ಮಖಿವು ಅಜ್ಜು ಝೂಟು ಬೋಲಾತೆ ಆತ್ಮ ಖಿವುಕರಿ ಅಪ್ಪುನ ಮಾಲುಮ್ ಹುವ್ವಾಸ್.

ದೇವ್ನಿ ಪ್ಯಾರ್

7 ಪ್ಯಾರ್‌ನ ದೋಸ್ತಿವೊ ಅಪ್ಣೆ ಏಕ್‌ಧಿಏಕ್ ಪ್ಯಾರ್ ಕರಿಯೆ ಶನಕತೊ ಪ್ಯಾರ್ ದೇವ್‌ಧಿ ಆಯುಹುಯು ಹುಯಿರ್ದೊಸ್ ಅಜ್ಜು ಪ್ಯಾರ್ ಕರಾವಾಳೊ ಹರೇಕ್‌ಬಿ ದೇವ್‌ಧಿ ಪೈದ ಹುವವಾಳೊ ಹುಯಿರ್ದೊಸ್ ಯೋ ದೇವ್ನ್ ಮಾಲುಮ್ ಕರಾವಾಳೊ ಹುಯಿರ್ದೊಸ್.

8 ಪ್ಯಾರ್ ನಾಕರವಾಳೊ ದೇವ್ನ್ ಮಾಲುಮ್ ಕರಿರಾಖ್ತೊಂತೆ ಹುಯಿರ್ದೊಸ್. ಶನಕತೊ ದೇವ್ ಪ್ಯಾರ್‌ವಾಳೊ ಹುಯಿರ್ದೊಸ್.

9 ಅಪ್ಣೆ ಇನೇಧಿ ಬಚಾನಖ್ವಾಜೆ ಇನ ಏಕ್‌ಸ್ ಛಿಯ್ಯಾನ ಜಗತ್‌ಮ ಮೋಕ್ಲಮಸ್ ದೇವ್ನಿ ಪ್ಯಾರ್ ಅಪ್ಪಾಮ ಅಯಿರ್ದೊಸ್.

10 ಅಪ್ಪೆ ದೇವ್ನ ಪ್ಯಾರ್ ಕರ್ಯ್ಕೊಯ್ನಿ, ಕತೋಬಿ ಯೋ ಅಪ್ಪುನ ಪ್ಯಾರ್ ಕರೀನ್ ಅಜ್ಜು ಅಪ್ಪ ಪಾಪ್ ಪರಿಹಾರ್ ಖಾಜೆ ಇನ ಛಿಯ್ಯಾನ ಮೋಕ್‌ಲೊತೆ ಇನಾಮಸ್ ಪ್ಯಾರ್‌ನಿ ಖಾಜಿಗುಣ್ ದೆಖ್ವೆಜಾಸ್.

11 ಪ್ಯಾರ್‌ನ ದೋಸ್ತಿವೊ, ದೇವ್ ಅಪ್ಪುನ ಅಮ್ ಪ್ಯಾರ್ ಕರಾಪರ್ ಅಪ್ಪೆಬಿ ಏಕ್‌ಥಿಏಕ್ ಪ್ಯಾರ್‌ಕರ್ನ್ಯಾಸ್ ಕರ್ನ್ಯಾ.

12 ದೇವ್ನ ಕೋಣ್‌ಬಿ ಕದೇಬಿ ದೇಖ್ವುಕೊಯ್ನಿ. ಅಪ್ಪೆ ಏಕ್‌ಥಿಏಕ್ ಪ್ಯಾರ್‌ಕರ್ಯ್ತೊ ದೇವ್ ಅಪ್ಪಾಮ ರ್ಡ್ವೀಸ್, ಅಜ್ಜು ಇನಿ ಪ್ಯಾರ್ ಅಪ್ಪಾಮ ಭರ್‌ಪೂರ್‌ಥಿ ರ್ಡ್ವೀಸ್.

13 ದೇವ್ ಇನಿ ಆತ್ಮಾನ ಅಪ್ಪಾಮ ದೀರಾಖೊತೆ ಇನಖಾಜೇಸ್ ಅಪ್ಪೆ ಇನಾಮ ಛಿಯೆಕರಿ ಮಾಲುಮ್ ಕರಿಲಿಯೇಸ್.

14 ಬಾನೆ ಇನ ಛಿಯ್ಯಾನ ಜಗತ್ತೊ ರಕ್ಷಕ್ ಕರೀನ್ ಮೋಕ್ಲಿರಾಖೊತೆ ಅಪ್ಪೆ ದೇವಿರಾಖ್ವಾಸ್. ಅಜ್ಜು ಇನಿ ಬಾರೇಮ ಅಪ್ಪೆ ಸಾಕ್ಷಿ ಬೋಲಿಯೇಸ್.

15 ಯೇಸುಕ್ರಿಸ್ತ ದೇವ್‌ನೊ ಛಿಯೊಕರಿ ಕೋಣ್ ಮಾನಿಲೇಸ್ತಿ ಇಪ್ಪಾಮ ದೇವ್ ರ್ಡ್ವೀಸ್, ಅಜ್ಜು ಇವ್ವೆ ದೇವ್‌ಮ ರ್ಡ್ವಾಳ ಹುಯಿರಾಸ್.

16 ಅಮ್ಮಾಸ್ ದೇವ್ ಅಪ್ಪಾಮ ರಾಖಿರಾಖೊತೆ ಪ್ಯಾರ್‌ನ ಅಪ್ಪೆ ಮಾಲುಮ್ ಕರಿರಾಖ್ವಾಸ್. ಇನ ಅಪ್ಪೆ ವಿಶ್ವಾಸ್ ಕರಿಯೇಸ್. ದೇವ್ ಪ್ಯಾರ್‌ವಾಳೊ ಹುಯಿರ್ದೊಸ್. ಪ್ಯಾರ್‌ಮ ರ್ಡ್ವವಾಳೊ ದೇವ್‌ಮ ರ್ಡ್ವವಾಳೊ ಹುಯಿರೇಸ್. ದೇವ್ ಇಪ್ಪಾಮ ರ್ಡ್ವವಾಳೊ ಹುಯಿರ್ದೊಸ್ ದೇವ್ ಪ್ಯಾರ್ ಹುಯಿರ್ದೊಸ್.

17 ನ್ಯಾವ್‌ತೀರ್ಪ್‌ನ ದನ್ಮ ಅಪ್ಪೆ ಹಿಮ್ಮಡಿ ರ್ಡ್ವಾನಖಾಜೆ ಇನಿ ಪ್ಯಾರ್ ಅಪ್ಪಾಮ ಛಾ. ಆ ಜಗತ್‌ಮ ಅಪ್ಪು ಜಿವ್ವುಕ್ರಿಸ್ತಯೇಸುನ ಜಿವ್ವುನಿಘೊಣಿ ರ್ಡ್ವೀಸ್ತೆ ಇನಖಾಜೇಸ್ ಆ ಭರೋಖೊ ಅಪ್ಪಾಮ ಭರ್‌ಪೂರ್‌ಥಿ ರ್ಡ್ವೀಸ್ತೆ.

18 ಪ್ಯಾರ್ ರ್ಡ್ವೀಸ್ತೆ ಹಿಜ್ಜಾ ಡರ್‌ಕೊರ್ದೀಯಿನಿ. ಡರ್‌ರ್ದ್ವೀಸ್ತೆ ಹಿಜ್ಜಾ ನಿಶತ್ ರ್ಡ್ವೀಸ್. ಕತೋಬಿ ಭರ್‌ಪೂರ್ ಪ್ಯಾರ್ ಡರ್ನ್ ಮಾರಿನಖಾಡಿದೇಸ್. ಡರ್‌ವಾಳೊ ಪ್ಯಾರ್‌ಮ ಪೂರ ಹುಯಿರ್ದ್ವವಾಳೊ ಕಾಹೆ.

19 ದೇವ್ ಅಪ್ಪುನ ಪಹಿಲೆ ಪ್ಯಾರ್ ಕರ್ಯ್ತೆ ಇನಖಾಜೆ ಅಪ್ಪೆ ಇನ

ಪ್ಯಾರ್ ಕರಿಯೇಸ್.

20 ಏಕ್‌ಜುಣೊ ಮೇ ದೇವ್ ಪ್ಯಾರ್‌ಕರುಸ್‌ಕರಿ ಬೋಲಿನ್ ಇನ ಭೈನ ವಹೇರ್‌ಕರ್ರೊತೊ ಯೋ ಝೂಟೊ ಹುಯಿರ್ರೊಸ್. ಶನಕತೊ ಇನ ಜೋಡ್ ರ್ವಾಳ ಭೈಯೆ ಭೇನೇನ ಪ್ಯಾರ್ ನಾಕರ್ರೊತೊ ಯೋ ದೇಖಕೊಂತೆ ದೇವ್ ಕಿಮ್ ಪ್ಯಾರ್ ಕರ್ಚೆ?

21 ದೇವ್ ಪ್ಯಾರ್‌ಕರವಾಳೊ ಇನ ಭೈ ಭೇನೇನ ಪ್ಯಾರ್‌ಕರನ್ ಕರಿ ಕ್ರಿಸ್ತಯೇಸು ಅಪ್ಪುನ ಹುಕುಮ್ ಕರ್ರೊ.

5

ಜಗತ್ವ ಉಪ್ಪರ್ ವಿಶ್ವಾಸ್‌ನಿ ಜೀತ್

1 ಯೇಸುಸ್ ಪ್ರಭು ಕರಿ ನಂಬವಾಳ ಹರೇಕ್ ಜಣಾಬಿ ದೇವ್ ಲಡ್ಕಾ ಹುಯಿರ್ರೊಸ್. ಕೋಣ್ ಇನ ಪೈದಕರ್ರೊತೆ ಬಾನ ಪ್ಯಾರ್ ಕರಸ್ಸಿ ಅಧ್ರಾನವಾಳು ಹರೇಕ್ ಜಣು ಇನ ಛಿಯ್ಯಾನ ಜಿನ್ನುಕು ಪ್ಯಾರ್‌ಕರಸ್.

2 ಅಪ್ಪೆ ದೇವ್ ಪ್ಯಾರ್‌ಕರೀನ್ ಇನಿ ಹುಕುಮ್‌ನ ಪಾಡಿಚ್ಚಾಲಥೀಸ್ ದೇವ್ ಲಡ್ಕಾನ ಪ್ಯಾರ್‌ಕರಾಶು ಕರಿ ಮಾಲುಮ್ ಕರಿಲಿಯೇಸ್.

3 ದೇವ್ ಪ್ಯಾರ್‌ಕರನ್ವಾನು ಕರಿ ಬೋಲ್ಕುತೊ ಇನೆ ದಿದೊತೆ ಹುಕುಮ್‌ನ ಲೀನ್ ಚಾಲ್‌ವಾನುಸ್ ಹುಯಿರುಸ್. ಇನು ಹುಕುಮ್‌ಖ್ವಾರು ಅಪ್ಪುನ ಕರಣ್ ಶಾತ್ರಿ ಕಾಹೆ.

4 ಶನಕತೊ ದೇವ್‌ಥಿ ಪೈದ ಹುಯೋತೆ ಹರೇಕ್ ಜಣುಬಿ ಜಗತ್ವ ಜುತಿಲೇಸ್. ಜಗತ್ವಜುತಾನು ಅಪ್ಪಿ ವಿಶ್ವಾಸ್‌ಥೀಸ್.

5 ಯೇಸುಸ್ ದೇವ್‌ನೊ ಛಿಯ್ಯೊಕರಿ ವಿಶ್ವಾಸ್ ಕರವಾಳೋಸ್ ಜಗತ್ವ ಜುತಾನ ಉಶೆಪಣ್ಣಿ ಜಗತ್ವ ಜುತಾನ ಅಜು ಕಿನೇಥಿ ಉಶೆ?

ಛಿಯ್ಯಾನಿ ಬಾರೇಮ ಸಾಕ್ಷಿ

6 ಪ್ರಭು ಯೇಸುಸ್ ಪಾಣಿಥಿ ಅಜು ಲ್ಹೋಯಿಥಿ ಆಯಿರ್ರೊಸ್. ಖಾಲಿ ಪಾಣಿಥೀಸ್ ಕಾಹೆ, ಕತೋಬಿ ಪಾಣಿಥೀಬಿ ಲ್ಹೋಯಿಥೀಸ್ ಆಯಿರ್ರೊಸ್ಸೆ. ಅನ ಪವಿತ್ರಾತ್ಮಸ್ ಸಾಕ್ಷಿ. ಶನಕತೊ ಪವಿತ್ರಾತ್ಮಸ್ ಖಾಚ್ಚೊ ಹುಯಿರೋಸ್.

7 ಶನಕತೊ ತೀನ್ ಸಾಕ್ಷಿ ಛಾ:

8 ಅಮ್ ಪವಿತ್ರಾತ್ಮ ಪಾಣಿ ಅಜ್ಜು ಲೋಯಿಕರಿ ತೀನ್ ಸಾಕ್ಷಿಖ್ಹಾರು ಛಾ. ಆ ತೀನ್ಲೇಬಿ ಎಕ್ಕ್ಸ್ ಸಾಕ್ಷಿ ದೇಸ್.

9 ಅಪ್ಪೆ ಅದ್ಮೇವ್‌ನಿ ಸಾಕ್ಷಿನ ಮಾನಿಲಿಯೇಸ್‌ನಿ ಇಮ್ಮುಸ್ ದೇವ್ನಿ ಸಾಕ್ಷಿ ಇನೇಥಿಬಿ ಘಣು ಮಹಾನ್ ಹುಯಿರ್ಲ್ವಸ್. ಶನಕತೊ ದೇವ್ನಿ ದೀರಾಖ್ಯೋತೆ ಸಾಕ್ಷಿ ಇನ ಛಿಯ್ಯಾನಿ ಬಾರೇಮ ಹುಯಿರ್ಲ್ವಸ್.

10 ದೇವ್ನ ಛಿಯ್ಯಾಮ ವಿಶ್ವಾಸ್ ಕರಾವಾಳೊ ಆ ಸಾಕ್ಷಿನ ಇನಾಮ ಲೀರಾಖಸ್. ದೇವ್ನ ನಂಬಕೊಂತೆ ಯೋ ಇನ ಝುಟೊಕರಿ ಬಣ್ಣೆರಾಖ್ಯೋಸ್. ಕಿಮ್‌ಕತೊ ದೇವ್ ಇನ ಛಿಯ್ಯಾನಿ ಬಾರೇಮ ದಿದೋತೆ ಸಾಕ್ಷಿಮ ಇನೆ ವಿಶ್ವಾಸ್ ಕರ್ಚೊಕೊಯ್ನಿ.

11 ಯೋ ಸಾಕ್ಷಿ ಖಿವಿಕತೊ ದೇವ್ ಅಪ್ಪುನ ಕೆದೇಬಿ ರ್ಹವಾನು ಜಾನ್ನ್ ದಿರಾಖ್ಯೋಸ್. ಯೊ ಜಾನ್ ಇನ ಛಿಯ್ಯಾಮ ಛಾ.

12 ಕಿನಾಮ ದೇವ್‌ನೊ ಛಿಯ್ಯೊ ಛಾಕಿ ಇನಾಮ ಜಾನ್ ರ್ಹೀಸ್. ಕಿನಾಮ ದೇವ್‌ನೊ ಛಿಯ್ಯೊ ಕೊ ರ್ಹೀಯ್ಕಿ ಇನಾಮ ಜಾನ್ ಕೊರ್ಹೀಯ್ನಿ.

ಕದೇಬಿ ರ್ಹಾವನೊ ಜಾನ್

13 ದೇವ್ನ ಛಿಯ್ಯಾನ ನಾಮ್‌ಪರ್ ವಿಶ್ವಾಸ್ ರಾಖವಾಳ ತುಮೆ ಕೆದೇಬಿ ರ್ಹವಾನ ಜಾನ್ನ್ ಲೀರಾಖವಾಳ ಕರಿ ಬೋಲವನಾಸ್ ಮೇ ತುಮೂನ ಆಖ್ಹಾರು ಲೀಖಿರಾಖ್ಯೋಸ್.

14 ಅಜ್ಜು ದೇವ್ನ ಖ್ಹಿಜ್‌ಛಿ ಶಾತ್ನೋಬಿ ಮಾಂಗಿಲಿದಾತೊ ಯೋ ಅಪ್ಪಿ ಬಿಂತಿನ ಖ್ಹಿಮಜ್‌ಶೆ ಕರಿ ಅಪ್ಪುನ ಭರೋಖ್ಹಿಛಾ.

15 ಅಪ್ಪೆ ಶಾತ್ ಬೋಲಿಲಿದಾತೋಬಿ ಅಪ್ಪಿ ಬಿಂತಿನಿವ್ಹಾರ್‌ನ್ ದೇವ್ ಖ್ಹಿಮ್‌ಜಾಸ್‌ಕರಿ ಅಪ್ಪುನ ಮಾಲುಮ್ ರ್ಹಯುತೋ ಅಪ್ಪೆ ಬಿಂತಿಕರ್ಯುಹುಯು ಇನೇಥಿ ಅಪ್ಪುನ ಮಳ್‌ಶೆಕರಿ ಅಪ್ಪಿ ಭರೋಖ್ಹಿಛಿ ಮಾಲುಮ್‌ಪಡಸ್.

16 ಕೋಣ್‌ತೋಬಿ ಇನೊ ಬೈ ಅಜ್ಜು ಭೇನ್ ಮರಣ್‌ಕೊಂತೆ ಪಾಪ್‌ಕರಾನು ದೇಖಾಯುತೊ ಯೊ ದೇವ್‌ಮ ಬಿಂತಿ ಕರಿಲ್ವವಾದೆ.

ತದೆ ದೇವ್ ಮರಣ್‌ಕೊಂತೆ ಪಾಪ್‌ಕರವಾಳಾನ ಜಾನ್ನ ದಿಶೆ. ಮರಣ್‌ಲ್ಯವಾನಿ ಪಾಪ್ ಛಾ. ಆ ಪಾಪ್ಪಿಬಾರೇಮ ಯೋ ಬಿಂತಿ ಕರಿಲ್ಯವಾದೆಕರಿ ಮೇ ಬೋಲುಕೊಯ್ತಿ.

17 ಖರಾಬ್ ಕರಾನು ಅಖ್ವಿಬಿ ಪಾಪ್‌ಹುಯಿರುಸ್, ತ್ಯೋಬಿ ಬಿಗರ್ ಮರಣ್ಣಿ ಪಾಪ್‌ಬಿ ಛಾ.

18 ದೇವ್‌ಥಿ ಉಬ್‌ಜಾವಾಳೊ ಪಾಪ್‌ಕರವಾಳೊ ಕಾಹೆ ಕರಿ ಅಪ್ಪುನ ಮಾಲುಮ್ ಛಿ. ದೇವ್‌ಥಿ ಪೈದಹುವವಾಳೊ ಇನುಯೋಸ್ ಬಚ್ಚಾಡಿಲಿಶೆ. ಕೇಡ್ ಕರಾವಾಳೊ ಇನ ಛೀಮ್‌ಶೆ ಕೊಯ್ತಿ.

19 ಹಿಡಿ ಜಗತ್ತಸ್ ಕೇಡ್ ಕರವಾಳನ ಕಬ್‌ಜಾಮ ರ್ಹಯುತೋಬಿ ಅಪ್ಪೆ ದೇವ್ ಮಳಿರ್ಲ್ವಾಳ ಕರಿ ಅಪ್ಪುನ ಮಾಲುಮ್ ಛಾ.

20 ದೇವ್‌ನೊ ಛಿಯ್ಯೊ ಆ ಜಗತ್‌ಮ ಅಯಿನ್ ಅಪ್ಪೆ ಖ್ವಾಚೊ ಹುಯಿರೋಸ್ತೆ ದೇವ್ ಮಾಲುಮ್ ಕರಿಲ್ಯವಾನಿಘೊಣಿ ಅಪ್ಪುನ ಖ್ವಿಯಾಲ್ ದೀರಾಖ್ಯೊಸ್‌ಕರಿ ಅಪ್ಪುನ ಮಾಲುಮ್‌ಛಾ. ಅಪ್ಪೆ ದೇವ್‌ನೊ ಛಿಯ್ಯೊ ಹುಯಿರೋತೆ ಕ್ರಿಸ್ತಮ ರ್ಹಾವಾನ ಖ್ವಾಚ ದೇವ್‌ಮ ರ್ಹಾವಾಳ ಹುಯಿರ್ಲ್ವಾಸ್. ಯೋ ಕ್ರಿಸ್ತಸ್ ಕದೇಬಿ ರ್ಹವಾನು ಹರ್‌ಹಮೇಶಾನೊ ಜಾನ್‌ಬಿ ಹುಯಿರ್ಲ್ವೊಸ್.

21 ಪ್ಯಾರನ್ ಲಡ್ಕಾವೊ ಮೂರತ್ ದೂರ್ ರ್ಹೀನ್ ತುಮುನ ಬಚ್ಚಾಡಿಲೇವೊ.

ದೇವ್ವಿ ಖಾಜಿ ವಚನ್
The New Testament in the Vaagri Booli language of
India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06